

湘綺樓日記

光緒十年甲申

湘綺樓日記

十年甲申歲正月建丙寅丁丑元旦晨起衣冠出講堂稭公來賀年恆鎮

如來未入而去諸生續至者十餘人稍間入內齋早飯諸生來者三班

芸閣昭吉五丁子孫來李懋章闖入客去復入稍愒方及午正閒和張

撫詩

良宵得句慶成功便列鵷行繼鄭崇官閣錦梅仍索笑雷門布鼓欲忘雙前驅已辦臨邛弩專闢新酬晉伯弓喜見元辰迎兩節回

班

笛吹協風八歌無恨轉餘歡爲喜西南得治安好助唐蒙通道未妨秦系關吟壇八騶緩咏知心暇萬里提封念齒寒今日三危抵

天柱勒銘

誰哺食甚甘飲酒一杯晚要吟梅步從南門至科甲巷還從

總福街過北門而歸得張楚珩書半山於十九日過梁山計三四日即

至矣喜可知也張伯圓復書夫妻嫡庶大和豈所謂暫且相安者耶李

世姪書來賀年夜飲二杯微醉

二日陰有風微涼張羊令吳光原入賀年飯後遣文入往太和鎮迎探遠

一出循例拜年遇尹殷儒於門彼此均不相識而相拜可笑也入督府
值將軍後至武巡捕竟未傳帖門開直入亦一奇也至王秀才齋少坐
又見賀四先生皆未嘗往還者吟梅後亦至芸閣齋穉公出談近韓後
至王生簡靜有道氣語不妄發丁孫之師也用階亦在坐晚飯至夕散
得王生光棣報得拔貢陳寶亦得拔改名瀟殆欲人呼爲肅邵御史似
亦非無耳目人人正未可意量看京報伯屏知大同元甫賞朝馬周家
楣文煜俱被劾李秉衡移廣西豈原籍浙江耶抑當今人物也夜至亥
寢

三日陰馮周蒲劉趙余吳生黃夢子用階臧幕見談未正略愒呼匠計露
臺值卅金欲作之未決也停課八日矣從來無如此久閒王立誠字子
修楊其儒字佩芳二人字皆旋問旋忘不可不記劉生來云邵御史病
甚孫公符革職

四日陰頗有寒氣晨起衣冠待客近韓來同出補答賀客惟見張子靜尙臥未起也循東門荒遠處皆去年所未嘗至者還小錢來倦未能見飯後黃郎來論團拜事王心翁病愈來談補服不挂珠問之云方親數轎錢朝珠絰手故去之間轎錢幾何云三百廿草堂寺僧爲送二百其明日則須三百八十昭覺僧可出四百然不敢受也佛門錢用之罪過又不能辭徐圖補報可耳聽其言娓娓有情理不自知其前席詢其得病之由則言向書辦支三十金不得至除夕萬弩齊發忙而愈焦遂不能支也八十五翁有如許精神只是心無知覺耳

五日陰欲雪半山竟不至張龍甲慣受騙以騙我前後被賺百千可笑也竟日未出亦無所事虛室生寒始有冬景夜霰敲竹凜然冰凍

六日雪午前坐外廳俄然皓白紅梅鮮潤尤饒豔賞頃之雪消見日改門窗移几榻久之但覺晝長舖後燎薪向火獨坐至亥乃寢今日迎春以

國忌移早一日似無舊典

人日陰晴晨冷午煊發帖請客開菜單亦爲功課與李代瑛以捐簿爲日課事正同也芸閣松翁俱來久談松翁自命涅槃無往來余云君自視能如世尊耶觀君根基正生淨土耳新歲韃椎此爲最切劉年姪來未坐而去乍寒乍煖殊不似冬景張月翁又和詩來此老好勝不肯讓人前不至雲南蓋自度不勝任而止未可以怕死譏之人不經用幾枉卻人材非以其諛我而喜之也然彼又送出一頂高帽矣

八日甲申立春成都在申正三刻蕭張來正換辮絲而錦又至亦吉兆也借廣敷論說三十六種自乙夜看至丁夜盡攬其趣蓋一講宋學大癡人其異者喜引古人詩文論事又引古事論詩文於小說取紅樓玉茗曲水滸傳略近金人瑞而佩服姚姬傳先生梅伯言郎中則俗之俗耳才氣辭華皆可觀視其六兄則大過之尙不及包慎伯也改春秋一年

得怙荆之義文入欲以誠致主家久而不旋亦復可念近日間雪間日
夜冷

九日晴見日閤易來言萬師耶不喫洋藥但近視耳治具招張月翁穉公
芥帆先來翰仙繼至穉公來後頃之月翁乃至并送蘭桂雜花爲別申
正入坐肴饌尙精客不多食主人未便飽啖也戎散有月鐙火清暉無
客中蕭索之景馮生病血往視之近歲苗而不秀者多殊爲忡惕曹桐
軒太尊來

十日晴朝食最晏至巳正矣飯後卽出過崧鹽曹府俱不遇至貴州館穉
公因團拜招客如崧王黃鳳顧俱先在更有楊椿橋朱次民何香雪羅
以禮張中軍皆雲南人頃之月翁至點追信一曲雜戲數折將軍岐元
子惠來設麪又送點心酉初送酒中間龍師擁至甚爲熱鬧月公首坐
余東岐西余與王蓮楊椿朱次羅裕同席酒肴甚盛鐙火鱗璨前所謂

絢爛極時也踏月自歸寂然無所謂平淡好者矣文八亦自中江還云有寧鄉黃太太妊身就道在順慶度歲龍甲所以誤認矣小數奇驗非解人亦不知其識也張貽山送詩來

十一日晨霜大晴已初乃起以昨夜寢已丑初又怯冷也盥頰時霜早銷矣日色乃漸淡毛監院來門役取婦而逃跡至其姨家婦私者成都府差也乃責其妻令不得妹不得歸又云爾可告官治我門役還姨已至俄而婦兄妻亦至云其夫走去已欲嫁皆反居門役家此事離奇使毛訊之呂生引一劉銘鼎來云字重甫學爾雅文選楊昶知州來字瓊圃極荒唐人也劉鳳修字永來云有名條宜代交夏觀察本有淵源非無故而干意氣傲岸若甚怨望者又云他人已亦難攀若惟我可俯就者昂然而去大似彭笛仙借錢氣象先甚怪之旣而思笛仙道高德重尙有市井之態人急則生不肖之心鳳修又何足論然亦奇矣記之以告

子弟改春秋一年遺覓貂袖於錦不得於慶得之張中丞送燕席一桌不知何人所送而以貽我不可辭謝勉強受之方與吟梅談宦游物候之詩高吟欲詠而人事相擾有類催租也此席擬以奠唐澤坡蓋去歲欲祭未果者家媵旣不至故宜了此一段蘭梅香發臘月不寒極佳光景也

十二日晴辰起詣唐家上香至公所團拜至者才一二人耳卽飯於別室待諸客有見有不見駐防鳳翔堂普請城中見任官設六桌余與芸閣陪將軍岐子惠曹李二太尊陪余看戲喫燒烤至子初乃散初以爲喧雜不成局竟亦敷衍無笑話得周芋生書

十三日晴陰院中作一敞軒今日填土督府龍鐙芥帆龍鐙繩子婦來拜年云李姓欲以婢進異哉奇想使人毛髮竦灑爲言人有天性薄者不養父母至不顧妻子則彼妻子厚而失養者猶爲成家人也此言可勝

悲淚崔玉侯道臺來與循舊鄰也對之慙愧親兵營龍鐙來獨有解數
得長沙棍法各以年饒湯圓彩紅青錢答賀之盤龍者翻綫之遺獨長
沙有七十六式督道二龍不如也以嫵屬未至故無多賞和張貽山廿
韻夜寢半山吟雲液旣歸二句余連呼之乃搖手似恐人驚者失聲而
寤明日有趙恩祐知府來字六雲請定詩集蓋其應也

十四日陰有日影唐提督子趙知府來微疾屏事復書周芋生周道臺振
瓊來請練勇自效李玉宣自邛州來賀年熊坦然來談

十五日晴午後陰晨起小食昇出答訪沈道臺守廉唐營官珊峰李邛州
玉宣謁芥帆雜談喫藕粉過張撫部督府先在巡捕謝客還過趙熊均
不遇入院已向午周寶清引二王生來唐珊峰來許時中張月翁先後
來月翁論頗有邊際大要不以王如爲然而頗賞周熙炳則未知其意
要之明白不結實不如其爲人也戊正復瀟瀟而雨助我蕭清張伯圓

送年禮瓢鹽云瓢鹽甚難得

十六日晴昨雨專爲元夜因檢日記比五年元夕皆有雨宜鐙火之不盛矣夏叔軒來意氣居然闊道用官禮自稱鄉教弟余大以爲不然亦猶曾沅浦之以晚輩待我見識不能高一篋皮也楊其儒來稟辭余又以爲不然宜入世之多忤申設要如冠翁黃澤臣錦芝生王蓮翁周雲崑會食錦最後至後去作書戒縉子復伯圓冠九欲請余公會余方欲辭而蓮翁遽云不可曾不待我辭畢其可惡如此正其老實也宜崧公之侮之亥初客散有王蓮鑒宋研云形製非古似是鑒家

十七日陰新軒將成釘桷聲喧朝食後出弔岳生父喪少坐出問慶保軒病賀翰仙生送月卿芝生行答訪夏陳鎮道俱不遇飛轎而還夕食後少眠夜改春秋三年張家照引趙生來求住院馮生血疾告歸陳用翁來辭行云越南劉軍復振法人聚保河口凡言交法軍情余皆不信以

遠隔難審虛實也就所聞料之法交實無戰事疑民教相閼耳而海內

皆以爲法人用兵中國震動所謂大謬

玉階苦軟眠羅鞋風颭邊見
小開笑倚闌干不聞語背花遙

鮑勳金
斂（有指）

夜謬至一處新屋十數家云是長沙城中有一家金字門楣書

舉人旁題彭申甫余笑此翁老不脫俗蓋其子弟所爲也然屋皆無人
云係新亂寇初去朶翁亦未見

十八日陰朝食後欲理經課書院內外諸生來翰仙來言送撫臺事又論
燕魯公請必不可去去則司道憎厭有甚飯後鐘余唯唯而心欲去甚
恨翰蓮之阻我也臧倉不遠幸身見之他日必序此一段以供後人之
一笑午後出城至惠陵小苑中候送月翁不敢令羣官知獨臥半時然
不能不上帖已而從人叢徑入見諸達官一揖便去誦袁子才詩云金
貂滿堂狗來必笑殆謂此也袁未嘗游金貂之中何以知狗之見笑余
自居於狗來去倏忽乃有神龍之勢未正歸頃之周朱兩道繼至李和

合久之亦至崧鹽在後田總兵中間來自云至好亦一奇也西集成散客亦尙歡王天舫詠陳平詩云盜嫂漫吹毛幸免吹而已理書去夔州十九日晴午見日至申陰范許兩教官張門生董妄人來招諸客飲恆鎮如張子靜穆芸閣鳳第堂但子餘顧相山先後來申正集戌正散食客殊不踴躍不及道臺以上舖餽可觀也陳茂勳來

廿日晴晨出答訪田鎮李提夏道何令陳縣丞惟見何夏何桂清之子楊坐師之坐師也余以世叔待之執禮甚恭何意甚喜已正還過許訓導不遇遇顧象三於途午始朝餐收拾鋪墊初理日課改春秋箋三年范生來留飯余意欲別調諸生中數人入內舍教之范當其一夜雨

廿一日陰胡進士黃壽湖道臺毛王監院來聞江瀆廟開門步入看之無一古物惟見黃翔雲綠轎甚新在正殿下未見黃也始欲鈔經而無可寫改春秋三年點宋史半卷錢法字句脫誤無本校改

廿二日早陰午晴春氣萌芽風日清美點宋史半本改春秋三年始補月來通課得每日一年也得郭見郎臘三日書猶欲逗留三版船想尙未行竟無信至亦可笑也李總兵來投帖未至齊敬齋來見未坐釋公來車馬盈門總集一刻送敬齋去釋公入已行裝矣云後日當往川北閱兵又言得岑公書劉永福已戰沒岑爲氣短唐拚命亟逃回昆明矣胡進士父壽昌來作揖請安自言讀書人也

廿三日己亥雨水陰夜雨改春秋五年點宋史半本宋史志難讀全用吏牘俗鄙字而不下注腳作者蓋自了了至今全不知爲何語若其文雅健猶可令人注釋之乃猥雜可厭萬無人肯爲宋史之學終古必無能通之者可笑甚也李游擊祥椿來署馬邊副將吳明海云美缺也欲出以國忌未果況氏送來一婢神似井研廖生年十五矣高僅三尺亟揮之去李太耶欠帳債主欲取償於我而爲此計劉夢得詩云誰將一

女輕天下欲易劉郎鼎峙心佐雜缺之比天下亦猶此婢之比孫夫人
思之莞然使劉郎視孫夫人如此婢則鼎峙不難矣西施玉環又何人
耶凡此皆長進學識之助光孝廉復送矮腳水仙頗似南產但葉色深
青耳水種與土種大異

廿四日大晴朝食後昇出至督府候送尙無行色坐芸閣齋釋公至談頃
之尙未飯各散余過近韓談遇王笙陔芸閣繼至復同還芸齋待未起
喫素麪督府發轍余亦飛昇出答訪三客均不遇道中見晴光朗麗不
覺有遠游之想還看宋史半本改春秋半年僖二十八年事最多未知
廿亦有例耶無例耶趙劉兩生來見素服而談及樂非禮也光孝廉送辛
夷桃杏

廿五日陰雨不寒改春秋半年看宋史一本夏道臺來久談吟梅欲圖局
事而鹽局難之久而不決甚可笑也此等處又莫測釋公之意豈憎其

強取耶則乾脩一言可定客去夜坐無事又改春秋三年明日可畢釐
篇粗立條約牌示諸生暇豫優游頗能自適富順何生來見老成人也
夜戲作客坐箴二十八句

廿六日陰改春秋一年釐篇畢看宋史一本看肯甫試牘思其孤幽悽愴
頗似海門師而好任權貴則失雅道好名不好學之故也夜坐無事復
看宋史一本宋君臣好議論無一切實語皆掩耳盜鈴時生時滅大可
爲今日炯戒安徽劉生來藝見

廿七日陰新到余生與謝生同來見樂山郭生來見調院五年不至以王
天翁率兵欲捕其弟乃來求護身符也崔生自緜州來見張子富亦潛
入內坐胡進士招飲午初卽來催昇往便答訪李游擊略談乃知其味
根舊將盛稱何鏡海至昨見劉生宅客殊未至以爲過早頃之周雲崑
來孟辜董劉皆雜客顧子遠熟客獨談不休盛言陸大夫之醜戍散還

改春秋宋生自富順來致陳生書并韻稟僖元年傳云此非子也何以知其非子卅年百說不能得今夜乃知之經文自明且愧且喜

廿八日晴早寒食時未飯至周雲崑宅會飲夏道臺亦至李穆黃三道府來主人以饌具草野大斥廚人客皆不安未正散同芸閣往翰仙處小坐朱丁道臺來對門周緒欽召客仍早飯諸人唯去李添丁耳未暮而往戊正而還日課殊未理強點宋史半本改春秋箋說禘祫未可草草因罷

廿九日晴午後陰改春秋二年說禘祫已了又於諸義似皆洞其條理午後少惕嚴生來郭生來送雅魚略教以爲學之意點宋史半本送衣還芥帆與書李提督薦光孝廉昨夜舁中頻有差念今日與諸生談頗多善言治心未純頓起波瀾旋生旋滅亦爲可笑

晦節晴諸生來者相繼張門生來老張走書送白金三百兩開函甚訝之

正不知爲何事磨使卻金復書罵之若納賄通私則巧爲門生所見矣
老張矯矯自好而行不副言不意其以昭昭墮行也天譴之耶改春秋
一年點宋史半本夜無端寢食甚甘猶恍惚視窗光未曙

二月丁未朔晨出點名開課諸生猶多英秀深可喜也毛監院避嫌不來
午偈偶眠出看庭前櫻桃辛夷已開春思甚滿改春秋一年說狐射姑
殺陽處父尙未熨帖點宋史半本未出巡少城至芮少海處會飲胡進
士芸閣湘石先至子遠崧生後來從少城還甫出城而門閉夜倦早眠
明星碧映

二日陰作書寄連慶希白并寄男女衣料與之改春秋一年點宋史一本
蕪文志未細看諸生及曾昭吉陽春婦來芥帆復來辭行芸閣催客總集一時

復和張風子二絕未正乃出至洪知縣家

辛酉拔貢
歷城令

公請李湘石餞其

入京候選芮顧張賀穆五幕客翰仙觀察洪李

和合

及余唱戲至二更散